



PM-i aniba Selection Committee-i Chief Election Commissioner shimtsü

Sinner nem ita 3 tenokdangba agütsü



VOL. XXII ISSUE NO. 123 (ADOK 123)

DIMAPUR

AMUNGNÜ (SUNDAY)

TSÜKLAI (FEBRUARY) 16, 2025

₹ 5.00

NPDA-i Ayushman PM-JAY/CMHIS services meshibanger

Dimapur, February 15, 2025 (TYO): Nagaland Health Protection Society (NHPS)-i hopta ana tsüngda senotsü tagütsütsü aliba ajak agütsütsü nangzükba agi nija mozü kitem nung Ayushman PM-JAY/CMHIS services maneni angutsü.

February 13, 2025 nü NPDA aser NHPS den Confederation of All Nagaland State Services Employees' Association (CANSSEA) nungi teshimtet nübotem külem senden ka amendang NHPS-i NPDA dang hopta ana tsüngda senotsü ajak agütsütsü nangzükba liasü.

Iba tenangzükba nung ajemdaker NPDA-i public yaritsü mechi nung Ayushman PM-JAY/CMHIS services maneni agütsütsü telemetba agiogo.

Ajisüaka, NHPS-i ashiba ama mapang shitak nung senotsü mengura NPDA-i özüng kübok teyari bushitsüsa akümtsü aser nüngdakba mapatem inyaka

aotsü ta tekümdangtsü ka metetdaksüogo.

Future Generali Insurance (FGI)-i mapang talangka senotsü magütsüba ajanga nija mozü kitem nung senotsü timtem ajurua lir. Mozü kitem nung emergency medications, chemotherapy agents, laboratory reagents, dialyzers, hemodialysis atema tubings, oxygen aser surgical consumables dena essential supplies atema sen agütsür, ta NPDA-i ashi.

Mozü ki aika nung staff itasen agütsüba, facility maintenance, uninterrupted 24 hours electricity & water supply, aser CCU, ICU o NICU operations amala critical services inyaksangshia aotsüba nung senotsü timtem ajurur. Anungji bangdak ketdangsürtemi nangzükba ama inyaksü ayongzüker, aji ta mesüra healthcare tebilemtsü tulu ka ajurutsü ta NPDA-isa metetdaksüogo.

Tsutsung apu ajanga jajatsü melar: Mokokchung DC

Mokokchung, 15th Feb (TYO): Tuensang lenmang NH 202 nung Tsutsung apu yanglushiba mapa temogo, anungji, iba lenmang

nung gari jajatsü melar, ta Mokokchung Deputy Commissioner, Thsuvisie Phoji-i sangdong ka ajanga metetdaksü.

CM Khandu-i Arunachal Christian Forum den Freedom of Religion Act atema olemtepnür

Itanagar, February 15, 2025 (Agencies): Arunachal Christian Forum (ACF)-i Arunachal Pradesh Freedom of Religion Act, 1978 mapa inyaksüba anema noktaka atema Chief Minister Pema Khandu-i olemtep alitsü ayongzükogo.

Iba Act kübok inyakyim tasen latettba ya tamangba yimsü kecha anema masü ta CM Khandu-i ashi.

Arunachal Pradesh Freedom of Religion Act ya küm 46 tejakdang taoba chief minister P K Thungon alidang yangluba liasü. Iba Act ajanga tashiyim agi mesüra ashikülaka tamangba yimsü melendaksüba noktanger. Iba Act ajanga aibelenntem küm 2 tashi tepuokdak ayutsü aser Rs 10,000 tashi senchi achitsü melar.

"High Court-i tuyuba ama iba Act indang temzüng lateter. Iba Act ya Buddhist, Hindu, Christian, mesüra Muslim nunger shinga anema masü saka Arunachal Pradesh nung lisopurtem yaritsü tgngatetba nung yangluba lir" ta CM Khandu-i ashi.

Sorkar ketdangsürtemi iba Act atema sendaktepa alir ajak den olemteptsü mepishir, ta pai ashi.

Arunachal Christian Forum-i iba Act anema lungkak aittsü sentong renemba atema CM Khandu-i khen bilemdangtsü mepishio.

Arunachal Christian Forum-i iba Act mapa küma tenzükba anema lungkak aitba sentong

balala agitsü metetdaksüogo.

Parnoki Arunachal Pradesh Legislative Assembly budget session tenzükba anogo March 6, 2025 nü lungkak aitba sentong tulu ka agitsü sangoktsüogo.

Iba Act ya temzüngi memelar aser küm 46 tashi iba Act anema noktaka arur ta ACF-i ashi.

"Arunachal Pradesh nung Khristantemi February 10 nungi 17 tashi hopta ka piyong sarasadema lumitsü ayongzükogo. Iba mapang Khristantemi lokti sentongtem nung madentsü metetdaksüogo" ta ACF President Tarh Miri-i ashi.

February 17, 2025 nü Tennis Court, Itanagar nung lumia lungkak aitba sentong ka agitsü ayongzükba lir ta paisa ashi.

ACF-i taoba nung Chief Minister's Office nem shidi ka agütsüogo saka tang tashi iba atema bangzüng kecha renema mali ta Miri-isa ashi.

Arunachal Pradesh nung mezüngbuba Legislative Assembly ajanga Arunachal Pradesh Freedom of Religion Act, of 1978 agizük. Tashiyim, külakoktsüba mesüra mesüzüka tamangba yimsü melendaksüba noktangtsü atema Act yanglu. Ajisüaka tamangba yimsü telok balala, talisa Khristan teloktemi iba Act anema noktaka arur. Parnoki iba Act ya 'fundamental right to religious freedom' anema lir.

Naga nunger lanurtemi skill aser training nüngdaker: CM Rio Bendangertem marutsü atema lanurtemi mapa ajak inyaksüla

Kohima, February 15, 2025 (TYO): Naga nunger lanurtemi skill training agitsüla aser rongsenketzüng renloktsü aser tejakleni aotsü atema mapa balala inyaksüla ta Chief Minister Neiphiu Rio-i ashi.

Western Angami region kübok Mengujuma yimtsüng nung mapatong pezü lapoktsüba sentong nung CM Rio-i iba tayongzükba agütsü.

Honibarnü CM Rio-i Mengujuma village gate, Pfpfünei Tsiese (village founder monolith), Tsiesema ajanga Village AgriLink Bypass road aser Mengujuma Village Council Hall lapokja liasü.

"Kaketshir telok aikati Dimapur district nung özüng alema arurtem noktangtsü atema Inner Line Permit (ILP) mapa küma inyaksü takhangba agüja arur. State sorkari Dimapur nung ILP benokba metetdaksüogo saka 1979 nung ang Dimapur ya tribal belt ka ama sangdongba ajanga khuret kar lir" ta Rio-i ashi.

Naga nunger ya khenyongi balala ta ajitetba yong British nungeri Bengal Eastern Frontier Regulation Act yanglutsü aser iba ajanga Naga nunger alidaki tangar odang marutsü tenokdangba agütsür. Iba Act ya India nüjiso aser Nagaland state mangudang nungi benschia arur. Anungji ILP mapa inyaker aser urban areas

nung inyakyim balaka süaka yimtsüngtem nungbo Naga nunger sobaliba temzüng aser inyakyim ama benschir, ta pai ashi.

"Akokba tashi ILP mapa inyaker saka bendangertem Nagaland nung arua mapa meinyakdaksütsü atema Naga lanurtemi mapa balala shia metettsüla. Naga lanurtemi mapa ajak shia meteta inyakra bendangertem maridok nunga parnok sasa Nagaland toktsür aotsü" ta CM Rio-i ashi.

"State sorkari industry renloktsü aser rongsenketzüng ajungkettsü atema Kiruphema nung Industrial Infrastructure Development Centre (IIDC) aser Dimapur nung Industrial Growth Centre lapokaka Naga lanurtemi common facility centers teyari agitsü atema marur" ta pai sasaba olen ka ashi.

"Asenok ya consumer state aser non-producing state ka lir aser yamai dang ora, asenoki tangar memeneptsü. Naga nunger mapa meinyaker saka bendangertem arua yangi mapa inyaka tepok mesür" ta Rio-i ashi.

State sorkari Nagaland Public Service Commission aser Nagaland Service Selection Board ajanga tajungtiba shima sorkar mapa inyakdaksür anungji lisopurtemi tatidang atema kanga junga renemtsüla aser maparen shia metettsüla ta paisa shisem.

"State sorkari Nagaland nung

lisopurtem bendangtsü aser kümzüka ayutsü atema Registration of Indigenous Inhabitants of Nagaland (RIIN) mapa inyaker. Tanga state tem nunga Naga nunger lir saka parnok nem Nagaland nungbo indigenous rights magütsütettsü. Nagaland state akümdang non-Naga tribes - Garo, Kachari, Kuki, aser Karbi (Mikhir) nunger liasü aser iba jagi parnok nem Nagaland nung non-Naga indigenous inhabitants certificate agütsür" ta Rio-i metetdaksü.

Nagaland state mangudang arua alirtem nem 'permanent residents' aser state anguba sülen arur nem 'temporary residents' kulikaket agütsür aser shishilembartem nem 'working permits' agütsür ta paisa ashi.

Nisung ka nem indigenous certificate agütsütsü asoshi tashiji Village Council ket nung lir aser district administration-i jangjashiba sülen indigenous certificate agütsütsü ta paisa shisem.

Nübertemi sorkar schemes balala nungi tajangzük agitsü ayongzüker. CM Micro Finance Initiative kübok rongsenketzüng maparen atema Rs 15 lakh nungi Rs 50 lakh loan agütsür. Ano CM Health Insurance Scheme kübok public nem Rs 5 lakh aser sorkar mapa inyaker nem Rs 20 lakh tashi cashless treatment agütsür, ta Chief Minister Rio-i ashi.

President's Rule kübok Manipur state ana lemdangtsü tsübur

Imphal, February 15, 2025 (Agencies): Manipur nung President's Rule (PR) benoka alidang state ana küma lemdangtsü tsübur ta Congress aser Shiv Sena teloktemi metetdaksüogo.

"President's Rule benokba nung tetsübuttsü aketbaji Article 3 agiena ataba asütsü aser iba ya state tem tentetba aser yanglushiba indang lir" ta Shiv Sena, Manipur State Unit president M Tombi-i ashi.

Central lennirtemi 2018-2019 nung Jammu and Kashmir Union Territories ana küma lemdanga liasü aser iba ya Manipur nung tang yimtenren tensa den mesüktepa liasü ta Tombi-i ashi.

Manipur ana küma lemdangtsü akok anungji nübertem kümdanga alitsüla. India President-i PR tekaraba nung meyipa agitsü mepishir aser MLA temia tekaratiba nung sorkar tasen ka akümtsü atema tangatettep kati arutsü mepishir

Dikhu lenmang nung khu abenba gari ka tsükok; nisung ana atanga asü



Mokokchung, 15th Feb (TYO): Feb 15, 2025 nep 5:00 ako meta khu abenba gari ka Dikhu lenmang Tsüsapang Sector, Mokokchung yim nungi kilometer ka sür tesadang shi pilar len küboki

tsükok aser nisung ana atanga asü. Iba gari no. As 01 DD 9179 ya Mariani, Assam nungi Longkhim, Tuensang-i aorba liasü, ta police-i metetdaksü.

Police-tem lendong ajuruba

tesem tonger bushidang yangji nisung ana (2) sür angu. Tasür anaji – Mr. Yolise Sangtam (Arishi:53, Tebu Tenüng: Thsapongse, Yim: Angangba, PO/PS Longkhim, District: Tuensang) aser kaji Mr. Tsalise Sangtam, (Arishi: 51, Tebu Tenüng – Tonglise, Yim: Angangba, PO/PS Longkhim, District: Tuensang) liasü ta jangjaogo.

Police-i tim inyaksü mapa temer tasümag anaprongji tasür kinunger nem amoktsüogo. Iba lendong dak sentakba maparen bushisüngdangtsü asoshi Mokokchung Police Station-I nung case registered süogo, ta Police osang ajangasa metetdaksü.

Kohima DPDB senden nung KMC indang jembibi



Kohima DPDB senden aliba mapang tangokba noksa angur. (Kohima, Feb.15, 2025)

Dimapur, Tsüklai/February 15 (TYO): Kohima District Planning & Development Board (DPDB) senden February 15 nü DPDB Hall, Kohima nung menogo. Iba senden nung DPDB Chairman Dr. Tseilhoutuo Rhutso, MLA aser Kevipodi Sophie, MLA natia shilem agia liasü. Senden ya Deputy Commissioner Kohima, Kumar Ramnikant, IAS lenisüba nung agiogo.

DC-i taoba DPDB senden minutes lepa repringshi. Beti Bachao Beti Padhao (BBBP) tenzüker küm 10 ajungba nüngdem nung district felicitation sentong ka ayongzüka agi. Senden nungsa NBSE 2024 HSLC aser HSSLC nung tetsürtem rongnungi toppe Ketsino Jane Frances aser Ketsole Mekro na aser Woman Police Personnel Hili Kath Metsie-o nunger nem tetushi agüja liasü.

Leal Group Society Kohima aser Science and Technology Advancement and Research Society nati parnok züngoksemsü atema mepeshia PowerPoint presentations

agüja liasü. Ken o asadangba sülen Board-i parnok-i benokba agizüksü telemteba agia liasü. Board-isa, ARC Cooperation, BDO Kohima, aser BDO Botsa ta züngsem tasen asem agizüka liasü.

Maneni senden nung Kohima Municipal Council (KMC)-i parnok inyakyim indang PowerPoint presentation ka agütsü. KMC CEO T. Lanusenla Longkumer-i, KMC inception, organizational structure, aser revenue sources indang lemsatepa liasü.

Laisa, sanitation ya 2013 küm decentralized asü aser tang KMC-i gari 9 amshia commercial waste achaayanger aser kiyong balalai jana bendentsü atema gari 39 amshidar, ta metetdaksü. Laisa, hopta nung khen jila mereksü atema ki aoker 65 anisema lir ta mettedaksü. Lanusenla-i, PM SVANidhi scheme aser KMC website indang mettedaksü.

KMC-i tetsükdaksü ajangshiba indang jembiba mapang, itasen magütsütetba

ajanga sorkar teyari dak metalokba, KMC inyakyim atema office shitak maliba, sanitation gari tejen akümba, non-functional septage management plant, yokyatsüyartem atema tesem ka lateta maliba, Kohima Super Market inyaksangshi masüba, terenlok maparen atema tesendaktep tajung maliba indang lemsatepa den KMC-i benoka inyakba maparen balala indang metetdaksü.

Iba dak sendakba nung Dr. Rhutso-i, doka kiburtem nem parnok doka temeket merekdaksütsü benokdanga liasü. MLA Kevipodi Sophie-i aluyimertem parnoki tsünütetba chiyongtsü tem ayoktsü atema mejeta tesem ka lemsüktsütsü nüngdakba lemsatep.

Taruba DPDB senden nung present a PowerPoint presentation agütsütsü atema Industries & Commerce Department nem nonglokja liasü.

Senden tembangba sülen One Stop Centre atema gari ka tenzüka liasü.

High Court Bar Association-i Yarenjungla nem tenüngsang agütsü

Dimapur, Tsüklai/February 15 (TYO): February 12 nü Additional Judge of the Gauhati High Court asütsü atema Yarenjungla Longkumer shimba asoshi Gauhati High Court, Kohima Bench High Court Bar Association-i la nem tenüngsang agütsüogo.

Yarenjungla Longkumer ya 1983 küm Little Flower School Kohima nungi class 10 pass asü aser 1988 küm Lady Shri Ram College New Delhi nungi BA

(hons) renem. 1992 küm Campus Law Center Delhi nungi LLB renemba sülen la 03.11.1992 nü Gauhati High Court kübok Bar Council of North East nung züngoksema liasü.

1996 küm Junior Govt. Advocate ama la Government panel nung aden. La Jr. Govt. Advocate, Additional Sr. Govt. Advocate aser Sr. Govt. Advocate ama inyakogo.

Maneni la 10.04.2013 nü

District and Session Judge Kohima ama shim aser Special Judge Lokayukta, Session Judge Dimapur (anaben), Registrar Kohima Bench aser Secretary Judicial Law Department Govt. of Nagaland inyakogo.

Yarenjungla Longkumer ya Naga tsürtem rongnungi High Court indang judge ama shimba mezüngbula lir, koba Bar asoshi dang masü saka Naga tsürtem ajak asoshi nemadangtsü mapang ka lir.



Krishi Vigyan Kendra (KVK) Mokokchung aser Akashvani Mokokchung na külem sür Kobulong nung "Radio Kisan Diwas 2025" sentong ayongzüka akaba mapang tongti shilem agirtem aser tadenerkem külemi tangokba noksa nung angur. Iba sentong ya tongtibangsa radio ajanga aluyimertem nem aluyimba dak sentakba osangtsüsang tapu balala metetdaksütsü aser terenlok kadaksütsü nükjiong nung ayongzüka lir. Mokokchung, 15th February, 2025

Lokti asem nem Kohima District Road Safety Award' agütsü

Dimapur, Tsüklai/February 15 (TYO): Deputy Commissioner, Kohima, Kumar Ramnikant, IAS lenisüba nung January 17 nü Kohima District Road Safety Committee senden ka amenba mapang annual 'Kohima District Road Safety Award' tenteta liasü, koba district-level award ka lir. Iba naroküm den kuli kakat aser sentep sen 10000 agütsür.

Iba naroküm ya road safety dak sendakba nung teyari agütsüba kija, lokti mesüra department asem nem agütsür.

Iba naroküm atema Rhosiotho Nguori, NCS, Additional Deputy Commissioner, Kohima Convener ser selection committee ta tentet, kong Additional SP (Traffic & Protocol), Regional Transport Officer, aser Angami Youth Organisation tir züngsem liasü.

2024-2025 küm atema Kohima District Road Safety Award ya item lokti tentetnem nem agütsüogo.

1. Kohima Village Youth Organisation (KVYO): Kohima jila aser temeket nung road safety atema maparen balala benoka inyakba atema parnok tushir. KVYO-isa, nüburtem ajangzükdaksütsü

atema Kohima nung gari senzusenpong aser parking facilities achaayanga nung District Administration aser Police nem teyari agütsüogo.

2. Kigwema Youth Organisation (KYO): Kigwema yimtsüng nung gari tsükokba mapang nisung taküm kümzüka atema parnok tushio. KYO-isa, tongtibang tesemtem nung road safety signage, metal aser concrete crash barriers amenokba mapang teyari agütsüba den ketdangsürtem den sendaktepba National Highway mapang shitak nung anepalua arudar.

3. D-Block Youth Organisation: Highway nung two-wheeler anishirtem atema road safety awareness ayongzüka agiba atema tushio.

Item narokümtem ya February 15 nü Kohima District Planning and Development Board (DPDB) senden amenba mapang Dr. Tseilhoutuo Rhutso, MLA & Chairman, DPDB, Kohima, Kevipodi Sophie, MLA, aser Kumar Ramnikant, IAS, Deputy Commissioner & Chairman, Kohima District Road Safety Committee nungeri agüja liasü.

Wameken nung Watershed Yatra campaign ayongzüka agi



Dimapur, Tsüklai/February 15 (TYO): Department of Land Resources, Government of Nagaland-i ayongzüka, Mokokchung district kübok Wameken yimtsüng nung February 15 nü district level Watershed Yatra ayongzüka agiogo.

Watershed terenlok inyakyim aser ali wazüka ayutsü atema inyaktepba nung nüburtem shilem agidaksütsü nükjiong nung iba campaign ayongzüka agiogo.

Sentong nung Wameken Village Council Chairman-i lokti pela agizükba o jembibi aser District Project Officer (DPO), Land Resources Department, Sentinungla-i sustainable environmental practice nüngdakba lemsatepa liasü.

Sentong nungsa Block Development Officer Tuli, Aienla Jamir-i achaayanga Land and Water Conservation tenangzüktepba agia liasü. O jembiba mapang Jamir-i, kanga kara renloka aoba alima ka nung takhangba aika aliba ajanga tetsükdaksü balala ajangshiba indang lemsatep.

Lai ashiba agi, alima rongsen

kanga kara samayonga aoba ajanga tzü mopung kanga melenshidaksür. Lai, water harvesting ajanga groundwater resources wazüka ayutsü aser süngtonga tema ali wazüka ayutsü koda tongtibang iba indang lemsatep. Maneni lai lokti dang tzü mopung jenjang tajungba kümdaksütsü atema jenjang agütsü aser taruba putu atema wazüka toktsütsü ajungshi.

DPO, LRD-i Watershed Committee nem tetushi agütsüba sülen Watershed Committee, Wameken mendenubai o tatsüka jembiba liasü. Sentong nungsa Merenti Self-Help Group (SHG)-i sobaliba ken ka aten aser watershed management dak sendakba nung SDAO Tuli, Temjentoshi aser BDO Tuli, Aienla Jamir nati shisatsü agüja liasü.

Anepdang sentong ya Watershed Development Team (WDT), LRD nungi Rosang-i tepela o jembir tembanga liasü. Chiyongba sülen quiz tetoktepba, van activity (AR) aser SHG products tem sayua ayokba amala sentongtem agia liasü.



February 15, 2025 nü Gurugram nung exam centre ka nung CBSE board exam 2025 jakdang tesayurtemi kaketshirtem nem nanglong agütsüdang tangokba noksa nung angur.

US nungi meindokertem Amritsar-i anir aruba atema aitsüteper

Amritsar, Tsüklai/February 15 (Agencies): February 5, 2025 nü US nungi meindokba India nungertem US sepaitem indang tayimtsü ka nung Amritsar yimti tashi anir aruja liasü; ano maneni US nungi tayimtsü ana nung ozüing alema US nung alir India nungertem Amritsar yimti tashi anir arutsütsü.

US nungi aruba tayimtsü anaji Delhi nung masü saka Amritsar yimti nung anenzütsü. Iba dak sendakba nung Centre aser Opposition na tsüingda aitsütep tenzükogo.

February 5 nü India nunger 104 Amritsar tashia anir aruja liasü, February 15 aonung maneni India nunger 119 Amritsar yimti tashi anir arutsütsü aser February 16 nüa India nunger aika Amritsar yimti tashi anir arutsütsü.

Punjab Chief Minister aser AAP lenir, Bhagwant Mann-i, ozüing alema US nung oa alirtem tayimtsü nungi anir arua Amritsar nung dang anendaktsütsü atema NDA sorkari telemtetba agiba ya state tenüing menüksütsü atema lir, ta aitsüogo.

Mann-isa US Tir Donald Trump danga, tang tayimtsü nung anir arutsüba India nungertem ya Ato kilonser Modi nem sempet agütsür asü?, ta asüingdang.

Centre sorkar aija Punjab Finance Minister Harpal Cheema-ia, "US nungi aruba tayimtsü Amritsar nung dang anendaktsüba ya ajanga India sorkari Punjab tenüing menüksüner. Kechiba item tayimtsü Haryana mesüra Gujarat nungbo manenzükdaksür? BJP-i Punjab tenüing menüksünüba tejangja. Tayimtsüji Ahmedabad nung anentsüla," ta ashi.

Shiv Sena (UBT) MP, Priyanka Chaturvedi-ia, mezüing aruba tayimtsüji Gujarat nung anendaktsütsüla liasü, kechiyong US nungi mezüing meindokba India nungertemji teimbaka Gujarat nungi liasü, ta ashi.

Priyanka Chaturvedi-i,

"Mezüing tayimtsü nung meimchir ama mezüingshi anir arurtemji teimbaka Gujarat nungi liasü. Anungji iba tayimtsüji Gujarat nung anentsüla liasü. Ajisüaka ozüing alema oa alirtem ajakji Punjab nungi aser rongsenkettzüing jenjang mejungi aliba state ji Punjab ta sayutsü atema Amritsar nung anendaktsü," ta ashi.

Congress MP, Manish Tewari-ia Centre sorkar aija, "Kechiba item tayimtsü Punjab nung dang anendaktsür? USA-i ozüing alema oa alirtem ajakji Punjab nungi dang, ta shinerba asü. Gujarat aser Haryana nungia aika liasü. Nenoki tayimtsüji Delhi mesüra tanga tesem kar nung anendaktsütsüla liasü. Mezüingmeshibaji Punjab-i melamela magizütsü, ta Delhi-i angatetsüla. Kodang Delhi-i Punjab mezüingmeshitsü merangdir takoksa tulu angur ta Delhi-i angatetsüla," ta ashi.

Ano külen Punjab BJP Tir, Sunil Jakhar-ibo, opposition-i onük tilateri ka agi onük tuluka kümdaktsütsü meranger, ta aitsü.

"Opposition-i onük tila agi tulu kümdaktsütsü meranger. Meindokba ajakji India nungertem lir. Iba ya tayimtsü Amritsar nung anendaktsüba onük ka masü, saka meimchir ama mezüingshiba onük ka lir. Item nisungtem jagi kechiba tim masüba lenmang ajanga ao, ta peisasa shisadangtsüla. Iba tebilemtsü onük atema yimtenren party ajaki longjemer inyaksüla," ta paisa ashi.

Ano BJP lenir R P Singh-ia, "US nungi India-i aruba tayimtsütem anentsü atema international airport anasatibaji Amritsar lir. Ibayongji ozüing alema oa alirtem anir arutsüba US nunger tayimtsüji yangji (Amritsar) anen. Iba onük ya yimtenren onük ka tekümdaktsü aser nenoki imdangjema bilemba ajakbo tejembi," ta metetdaksü.

Ano BJP MLA Manjinder Singh Sirsa-ibo Punjab nung AAP sorkar aija, AAP-i Punjab raksatsüogo, ta metetdaksü.

Singh-i, "Punjab nung lanurtemi America-i aotsü atema ali ayok. Travel agent temi parnok dang nungi auya aser tim masüba lenmang ajanga parnok US-i yok. Bhagwant Mann-i aniba sorkar aser police-i travel agents dang nungi sen agir. Parnoki nisung meyrjang aika mapa makai kümdaktsüogo. AAP-i parnoki Punjab raksatsübaji asadangtsüla. Nisungtemi US nung ajak toksür Punjab-i meyipa arutsü, ta parnoki (AAP) jembia liasü, ajisüaka parnoki Punjab toksür aotsü atema ali ayoker. Ajisüaka tang tashi AAP-i asayamenür," ta metetdaksü.

Punjab nungia tim masüba lenmang ajanga US-i oa alir kanga bulua akümba dak sendakba nung taoba hopta Punjab sorkari Punjab police dang special investigation team (SIT) ka tentettsü aser state nungi ozüing alema nisung shibelenba mesüra tim masüba lenmang balala ajanga bendangleni aoba kulitem bushisüingdangtsü tuyuogo.

PM-i aniba Selection Committee-i CEC shimtsü

New Delhi, Tsüklai/February 15 (Agencies): Hombarnü New Delhi nung Ato kilonser Narendra Modi-i aniba selection committee senden amentsü aser chief election commissioner (CEC) tasen shimtsü atema telemtetba agitsü.

Iba committee nungjisa Lok Sabha nung Opposition lenir, Lok Sabha Rahul Gandhi aser Union Home Minister Amit Shah nata densema lir.

Hombarnü Ato kilonser official kidang committee senden mena CEC tasenba shimtsü. Tang teinyakdak Chief Election Commissioner (CEC), Rajiv Kumar February 18 nü mapa nungi anisüngzüksü, aser iba anogojisa matongdang CEC



KOHIMA AO OFFICERTEM TELONGJEM
"Telongjem nung leniba"

METETDAKTSÜR

Kohima Ao Officer's Tem Telongjem (KAOT) rongdak lokti senden ka **February 20, 2025** nikongdang **4:00 ako** nungi tenzüka **Molu Ki, Kohima** nung alitsü metetdaksür.

Anungji, züingsem ajak arua adentsü asoshi mepshia sangdonger.

Sd/-
LIMASUNEP JAMIR, IPS
President, KAOT

Sd/-
RONGSENLEMZUNG
General Secretary, KAOT

Law Department-i AAP sorkari benokba ken otem reprangshir

New Delhi, February 15 (Agencies): Tawa Delhi assembly election nung BJP-i AAP madak takok anguba sülen anogo ishika tsüingda Delhi nung law department-i AAP dang tesüiba küm aika tsüingda party-i Centre aser Delhi Lieutenant Governor anema court nung benokba ken otem osang tejangja agüjang, ta metetdaksüogo.

Osang angazükba agi, tesüiba küm ishika tsüingda AAP sorkar aser Centre mesüra LG tsüingda court nung ken o benoktepdang "inter-department" litigation nung sen crore 300 indokogo.

Court nung item ama ken o benoka angadangba ajanga mapang aika amajok nung laluogo.

Tang aliba ken otemji sorkar tasenba ket nung agütsütsü aser item ken otemji reprangshitsü.

Delhi nung yimsüsüba/ketdangsüba dak sendakba nung AAP sorkar, LG aser Centre tsüingda aiben mangatettep adoka liasü, aser court nunga ken o aika benokogo.

Talisa 2022 küm May ita nung V K Saxena-i Delhi LG tenangzükbaga agiba mapang nungi tenzüka court nung ken

o aika benokogo.

Supreme Court aser high court nung benoka aliba tongti ken otem rongnung LG kübok services aitsütsü atema benokba ozüing anema aser Yamuna ayong menenba nokdangtsü atema Saxena leniba nung high level committee ka tentetba anema AAP-i benokba ken otem densema lir.

Delhi nung sorkar tasenbai item ken o ajak agientsü atema court matsüingdang benoktsüa akok, ta osang angazüker.

Delhi sorkar ketdangser kati, Centre nung BJP-i aniba sorkari, Delhi nung services dak sendakba ajakji LG kübok asütsü telemtetba agiogo, ta metetdaksü.

Paisa, "Tangbo Delhi nung BJP sorkar lir, anungji item ama ken oji maneni angadangtsü menüingdak. Item ken o ajak agientsü atema sorkar tasenbai court matsüingdang benoktsüa akok," ta metetdaksü.

"Item ama ken o agienba ajanga sorkar, Centre aser LG tsüingda menüingdakba nung mangatettep madoktsü, aser Delhi sorkar o Centre nati tesendaktep tajungba yanglua yimti tenrelok atema inyaksü," ta paisa metetdaksü.

tasenba tenüing sangdongtsü.

Search committee kati CEC menden atema shimba tenüing kar agüja lir aser PM-i aniba Committee jagi item candidates rongnungji ka shimtsü. Committee-i CEC menden atema tenüing benokba sülen linük Tiri CEC tasenbaji shimtsü.

CEC Rajiv Kumar sülen senior-most election commissioner ji Gyanesh Kumar lir. Pa kümsük January 26, 2029 tashi lir. Ano election commissioner kaji Sukhbir Singh Sandhu lir.

Tang tashi nungbo CEC teinyakdak anisüngzükbaga sülen CEC menden atema senior-most election commissioner (EC) shima aruogo.

Ajisüaka CEC aser ECs shimba dak sendakba nung yaküm ozüing tasen ka benokogo. Iba ozüing kübok search committee kati CEC menden atema secretary-level officers nisung pongu shima Ato kilonseri aniba committee nem agütsür.

Ano külen Rajiv Kumar anisüngzükbaga ajanga menden tazüing ka adoker, anungji CEC tasen shimba denji külemi Election Commissioner-a tasen ka shimtsü.

CEC shimtsü atema tang mezüing Chief Election Commissioner and other Election Commissioners (Appointment, Conditions of Service and Term of Office) Act, 2023 amshir.



TIR YIMYIM YIMOBILEM (EDITORIAL)

DIMAPUR AMUNGNÜ, FEBRUARY (TSÜKLAI) 16, 2025

Temenen memenatsüsa ain adokba

Laishibai asenok dang kenyongi ain madoktsüla tabo mashir, saka ain adokaka temenenbo memenatsüla ta Efesa tapu 4:26 nung shia aliba angur. Asenoki iba Lai tekong nung shia aliba o ya jungjunga bilemdangra, ainbo adokyonga kecha mali saka temenen menatsüsa ain madoktsüla ta ashibaji temenen mapatem anemabo ain adoktsüla ta angatettsü junger. Atangji, nisung tajung aser taremsük süaka, taküm nung aiben ain adoktsüsa tensa tia ajurur. Iba jagi aiben tangartem den mepelatep adoker aser kar denbo takua chiteper. Ajisüaka, laishiba nung shia aliba amaji, taküm nung kodanga ain madoktsüla ta masü saka tamajungtem anemabo ain adoktsüla. Aji oda, kodang asenoki asen anema atalokba tamajungtem anema ain madokli, ibajiang tai aser temenen menar asütsü. Ajisüra, tanübo asenok nisung shiai asenoka kodangsa ain adoker ta bilemdangtsü junger. Ashiko, asenok karbo asen taküm libaliro mejungi seplepa aoba ngua tangari metongshitsü nung, aji manganüi ki oset ajak raksaa ain adoka alitsüa akok. Mesüra aseni aginüba ka mangu aser matong nunga ain adoka alitsüa shibai metet. Ano, karbo tangar mapa nung takok anguba ngur mesüra kibong tajungba küma aoba ngur tenük merem agi ain adok alitsüa akok. Aji oda, asenok ain adokbaji asen tai nembangtsü atema adokra mesüra asen dak tenük merem aser mekokachi shisatsü aliba agi tangar ajungba ngur mepelatet ain adokra, item ain adokba manung anü teludaktsü aser itemji asenok mulungjang nungi piladakjang ta kasa Laishibai ashir. Item ama ain adokba ajanga Tsüngrem anema temenen menaba ainapong tamajungtemji yutsür, tanü asen loktiliba nung tamajung kechisarina atalokba temenen mapatem anema Khristantemi ain madokra, asenokji temenen anema raratsü memulungba Khristan purtem asütsü. Efesa tapu 6 nungbo ashir, temenen anema takok ngua raratettsü asoshi Tsüngremer raraba sübotsü sübor asenoki alima nung tamajungtem anema raratsüla. Aji oda, tejen putu nunga kodang Israel nungertemi Tsüngrem jashitsüsa temenen mapatem inyak aser Egypt alar tia nungi parnok anitetba Yihova Tsüngrem yutsür süngyanglu külemtsü tenzük, Tsüngremi yokba ainkertem aikati ain adoka Israel nungertem arütsüba asenoki angur. Kasaji Yisu alima nung alidanga pai temenen tanülatem arütsü aser Yirusalem tenla kimabo pai shishilembartem meyong langpang dena meküpdokja inyakba asenoki tasen Laishiba nung angur. Iba ainji tanü asenok Khristantem dak alitsüla. Tanü asenoki ngua ozüng yanglurtemi ozüng raksar, ketdangsertemi ochishia ketdang mesütetter, nübortemi pei temeten sen yong aser mapa yong yoka achir. Akhi tejen putu nung Isaia ainker mapang nung ama, tanü asen putu nunga "Ochiobendang tesüleni meyipogo, teindang mapatem talangka nung oa lir, ochi yimdong nung laoa lir aser shitak inyaktsü makoker, anungji ochii makoker aser shiba ochishia lidir pa dang akoksar," Isaia 59:14-15. Iba ama asen lima tia ya kodang asenoki ngudir, asenok mulung nung ain adoka mebilemiang malitsü. Item tamajung, ochi yimdong nung laodaktsüba temenentem anema asenoki ain adoka ayimtentsüla aser itemji ajungdoktsüla. Item jagibo nübortem rongnung meputep aser tsükchitep madokdaktsür. Laishiba nung temenen memenai ain adoktsü ajungshibaji itemji asütsü. Atangji, tanü asen meketa tamajung agi sünga liaka, asenok mejashir, ain madoker saka pelapela dang lir. Aji oda, tamajung nung pelaba Khristantembo asenokang asütsüa akok. Asenoki tamajung aser temenen mapatem anema ain adoktsü melen temenen mapatem ajanga takok anguba asoshiang tenüngsang agütsüteper. Asenoki joko tamajung o tajung na aser teindang o meindang na tsüngda mebendangtetter. Ashiko, ibaji Efesa tapu 4:19 nung shia aliba ama, asenok tamang aser tangatetba nung 'pezüpezüa' akümba agi, temenen mapatem anema ola adoktsü tashi mali aküm asütsüa akok. Aji oda, tanü ama ochi yimdong nung laoa aliba mapang ya asenoki tamajung anema ain madokba yaang tai asütsüa akok. Iba tangatetba nung asenokbo tai menatsüsa masü saka tai anemabo ain adoktettsüsa asenoki Tsüngrem dak amangdi.

OLEMSABANG

AO AROGO YIMDEN AKANGSHIA YANGLUSHITSÜ NUKLA

~ Wati Longchar (Erilibill)

Ao arogo yimden yimsüsuba yanglushitsü nungdak ta YSS sensaksem nung, sabangpur kari Mizoram Baptist Church (BCM) inyakyim asen arogo nung apettsü ta shisem nung BCM model "Ao Arogo Yimden Yimsüsuba Yanglushitsü Nungdak: BCM nungi Tangazüktsü" ocet nung tongmelang agi lemsatepogo. Kari parnoki Synod system (BCM-i Synod ta majar saka 'Assembly' ta dang amshir) nung aor, anungji Baptist Arogo Noktakdak (Baptist Distinctive) nungi ainershir masü no ta jembitep. Ano iba sentakba nung ocet, "Arogo nung shiba Kibur?" nung congregational-centred church koda tongtibang iba indang lemsatepogo.

Ao arogo yimden yimsüsu akangshia koda yanglushitsü ta asüba onuk nung shisatsü aika lemsatepogo. Sabangpuri lemsatepba ajak to pei azüngba, anguba, ajangshiba (karbo olulu, kar shitak tatalokba saka generalize masütsüla) nung ajemdaker tebilemba lemsatepogo. Item tebilemba dangji hypothesis ta ajar. Shitak aser tai memetet. Shitak asü masü empirical research agia test asütsüla. "Empirical Research" ta asür "Coming out with truth from the field" ta ajaki meteta lir. Asenoki kechisa hypothesis lemsatepogo item to shitak/tai metettsü scientific questionnaire yanglur shinga atsünga (bias) mali ochi kuli (fact) adokdaktsüla. Anungji YSS sabang nung lemsatepba ya shitak/tai tametettsü atema yimtsüng shiai oa scholar telok / independent researcher kari empirical research agitsüla. Arogo aser Mungdang nung tenzükeri dang masü, social scientist nem inyadaktsütsüla. Tetezü tanü asen arogo koba jenjang nung lir, koma melenshi nung ajungtsü empirical research ajanga adokdaktsütsüla.

Arogo yanglushitsü atema tebilemba (hypothesis) lemsatepba kar

- Mungdang aser lim arogo tenzükertem itasen aser tanga facility liromedem maka. Ibai ajanga yimtsüng aser town arogo tsüngda telemsa tulu adoka lir. Mungdang ka kübok Khristar arogo nung ibai ochimashi mapa ka aser Baptist distinctive den meputep.
- Arogo rongsen nung tepila tulu aliba ajanga Ao arogotem nung "superior" aser "inferior" attitude/ mindset adoka lir. Mungdang ka kübok saka tepila ulura aser equal resource sharing makara, Ao arogo nung tarutsü nung telemsa tulu adoktsü.
- YSS sensaksem yagi arogo nung telungjem masü, arogo lemdangtsü lendong lir. YSS nung shilem magitsüla.
- Yimtsüng nung nubur ajema akümer, aluyimera ajema akümer, aser Govt. mapa inyaker maliba ajanga yimtsüng arogotem rongsen angulen mali küma odar. Na kong tanela chiyungtsü angur yangji ter shilem aser tenla agütsütsüla ta tangatetba ajanga Town arogotem nung sen agir-magima arur, saka yimtsüng nung arogo tenzüker nem ita sen agütsütsü maka ta asüba jenjang nung lir.
- Tenzüker asoshi arogoi shisatsü bushiloktsü sadema magütsüba ajanga aser küm aika arogo ka nung dang tenzüka agi nuburtemi alaker aser maginer.
- Tensa den peta tanela chiyungtsü magütsüba agi intellectual aser lanurtemi sentepi maruner.
- Lim arogo aika autocratic leadership küma aor kechiaser tenzüker karibo pai/lai ashi angar dang arogo menden nung anioka inyaker. Deacon shimba yayim yanglushitsüla.
- Arogo kar nung tenzüker ola madokteti alena ayuba ajanga arogo mainer
- Ao arogo nubur-teyongtsü (congregation-centered) masü tenzüker-centred (clergy-centred) küma odar. Congragational-centred dangi meyiptsüla
- Transfer aser term system bener ait nungbo, election nung ama sen agi Town nung posting ate ma aliteptsü
- Mungdang inyakyim nung tebur clergy dominate sua lir. Laity aser tetsür ola makaba ajanga arogo tashi maiter.
- Town arogo nung nutsüng/ kibong aika asüba agi santemi mess fee-bo agütsür, saka sannuker pei san tenung memeteti lir (ano aika lemsatep)

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Impur nung sannükertem asoshi Ao oshi terenlok sentong agi



Impur, Tsüklai/February 15 (TYO): ABAM Christian Education & Literature Ministry ajanga Ongpangkong aser Ao lima ajanger aliba Arogotem nung sannükertem asoshi Ao Oshi Terenlok Sentong ka "Ao Oshioben aser Zülumen Lirumedem" onük nung rangloker, Tsüklai 14, 2025 nü Impur nung agia liasü, ta ABAM Executive Secretary, Rev. Dr. Mar Pongener-i sangdong ka ajanga metetdaksü. Tanü Ao Oshi ajanga tenzükba wadang nunga tongti shilem agir aser loktiliba nunga pei ayak kümzüka ayur. Ajioda, oshi ka dang süaka aiben lirumemedemi tongtepratep abensa mesütetba tensa aiben ajurur. Anungji asen libaliru ajak

Kentucky Revival nung lanur 2,000-i Khrista nem bendanga agütsü

February 15, 2025: America tesem ajaklen college campus aika nung Unite US sentong agia lanur aikati Khrista nem taküm bendanga agütsür, baptir aser tekülem sentong agir. February 12, 2025 aonung University of Kentucky nunga Unite US sentong nung kaketshir 8,000 shi aden aser parnok 2,000-i Khrista nem taküm bendanga agütsüba sülen aika tzü nung baptia liasü. Unite US sentong nung o jembir aser IF:Gathering tentetsang, Jennie Allen-i, "Iba ya mamangtetsüka lir. Iba ya maneni ataloker. Iba ya tesüngmangtsüka lir," ta ashi. Yisu Khrista tenüng ajungkettsütsü tejangraba nung Unite US ya tenzüka liasü. 2023 küm September ita nung Auburn University indang Neville Arena nung Tsüngrem külemtsü atema kaketshir 5,000 adenshia liasü, iba sülen anasa aliba awatsüng ka nung kaketshir 200 bapti. Iba mapang nungjagi tenzüka US tesem ajaklen college/universities aika nung asentenshi sentong maneni agia arudar. Unite US sentongtem nung tang tashi nung college azünger 70,000 dak tali denogo. University of Kentucky nung Tsüngrem külemtsü atema kaketshir 8,000 dak tali adenshia liasü. Allen-i, "Parnoki pei temenen nangzükba mapang shia ayimdener. Parnoki Khrista osangtajung agizüker. Kinü tanurtem mesüka parnok aikati Yisu

lirumedema inyaksangshia jembishinütettsü nükla nung iba sentong agiogo. Iba sentong nung tongti tesayurji Mr. I. Temjen Tzüdir, Coordinator, Ao Riju liasü. Ajak agi Arogo 36 nungi nisung 47 arua iba sentong nung aden. Maneni aseni asen oshi meraketa amshia tenyaba wadang inyaksü sarasademer. ajak bendanga agütsüba indang jembia liasü. "Tsükchirtemi aiben amakba ajanga na kanga anibelemer. Aiben Tsüngremi asen nükjidong atalokdaksütsü atema asen timtem-tejashi amshir," ta lai ashi. Sentong tembangba mapang tashi nungbo kaketshir noklang aikati Yisu Khrista nem taküm bendanga agütsü aser aika baptia liasü. Unite US nung o jembir aser Texas kübok Waco nung aliba Hariis Creek Baptist Church nung pastor, Jonathan Pokluda-i, "Pai ano maneni mapa inyakogo. Tamalen dang nungi tang mapa tuluba inyakogo. Iba ya tesüngmangtsüka liasü. Sabangleni kaketshirtem jenti arua Khrista nem taküm agütsü. Kaketshir aika baptitsüba ajanga ni tetsüng-teben ashir. Onoki Tsüngrem nem tenünsang agütsür. Pa nem tenünsang agütsür," ta ashi. Küm ana tejaklen Asbury University nung asentenshi milak mezüng jangruba mapang Student Life nung Vice-President, Dr. Sarah Baldwin-a liasü. Osangbener den jembidang Dr. Sarah-i, "Lanurtemi chichiba Khrista maitsü atema jangrar aser Khrista temeim meteta akümer," ta ashi. IF:Gathering tentetsang, Jennie Allen-i, "Yangi asentenshi milak lir. Onoki 'magic' mapa meinyaker saka Khrista osangtajung dang lemsateper. Lanurtemi Tsüngrem aginer, aser iba tepor ajungji tesüngmangtsüka," ta ashi.

ANOGO ABEN TSÜNGREM DEN

ANGASHIBA NUNGI TAMANG ADOKER

Anungji tamangji tangashiba nungi arur, aser tangashibaji Khrista indang sayutsüngiba nungi arur. ~Rom 10:17

Asenok ali meimchiri langka mesüra langkaa nungbosa tamang ayur aser aji kechi nung mesüra shiba dak angar iba jagi lemtettsür. Alimai ashiba angara, alima inyakyim nungji tamang ajak yuadoker alir. Aseni bilemba nungi tenzüker, inyakba, liba liro aser taküm rangben alima nem anidaksür. Kasaji, kodang Tsüngrem Oi ashiba aser iba O dak tamang yutetdir memeteti asenok taküm Tsüngrem mulungba nung jajar taküm ka ka akümer.

Tenyar Pauli Rom nung aliba tamangertem dang kasaji shia angur. Tamangji Khrista indang sayutsüngiba angashiba ajanga adokdaksür. Kechiyong tamang medeni Tsüngrem mulung chidaksütsü makok aser aji Pa O tenoka angar aser Pa bushirtemi dang ngutettsü.

Adianu tajungtem, Tsüngrem O angatsü asoshi temulungjang ajongai teyongyaba asen kija kibong nunga lir mali? Asen tamang kong mesüra kechi nung ayur? Arung, Pa O angaba nung asenok senti mapang tenladi aser Pa dak tamang katetba nung tsüngchirsa litetba tamanger ka ka asütsü anogo shia merangdi. Kechiyong Laishibai ashir, "Shibaisa pa dak amangdir pa makdaksütsü." Rom 10:11

February 15, 2025: Tang Justice Koome-i, "Iba mezüng Africa nung movement atema tang tashi nung linük 14 denogo aser 2025 küm atema onoki asalentong aika yanglua inyakdar," ta metetdaksü. Kenya nung Chief Justice, Martha Koome-i, tetenzük sentong nungji Africa tesem ajaklen tamangba yimsü temeden ajungkettsütsü atema inyakba judicial ketdangsertem aser organisation balala nungi lenirtem adentsü, ta metetdaksü. February 4 nü Washington D.C nung IRF summit aliba mapang nung video conferencing ajanga jembidang Justice Koome-i, "Iba maongka agia (IRF) taruba senden nung adentsü atema ni ajak jaoker aser Africa nung yimsü temeden ajungkettsütsü atema onoki inyakba nung nenokia nungittsü imlar," ta metetdakja liasü. Africa tesem aika nung yimsü nung ajemdaker reshikangshiba, talisa Khristantem reshikangshiba mapang ka nung Africa nung International religious freedom summit ayongzüker. Justice Koome-isa, Kenya nung judiciary den Pepperdine University aser Religious Freedom Institute senteper International Religious Freedom Summit ayongzüksü, ta metetdaksü.

Washington D.C nung anogo ananü tashi IRF summit aliba mapang nung taoba mapang international religious freedom nung US ambassador-at-large, Sam Brownback-i, Africa nung tamangba yimsü temeden jenjang kanga mejungi lir, ajisüaka teimla lir, ta metetdakja liasü. Paisa, "Africa nung onok partners aika lir- Nigeria, Egypt, Kenya aser tesem balala nung temelenshi adokdaksütsü atema inyaksü melunger aika lir," ta metetdakja liasü. Washington D.C nung agiba IRF Summit nung Africa atema temeja sentong ka 'Spotlight Africa: A Global Justice and Religious Freedom Initiative' ta ser agia liasü. Iba sentong nungji Africa nung yimsü temeden ajungkettsütsü atema o lemtepa liasü. Africa tesem aika nung Khristantem maneni tepseter, apur aser tepuokdak ayur. Open Doors report ajanga ashiba agi, 2024 küm Nigeria nung Khristan 3,100 tepset aser DRC, Burkina Faso, Cameroon den Niger linüktem nunga Khristan aika tepsetogo.

AO OSHI ANGAZÜKDAK:**TANÜ ANGAZÜKTSÜBA OJANG****Tejangtetsü**

(n)metsüjang tapu balala (different kind of seeds)

* Alu nung tejangtetsü Metsüremi (March) nung azünger.

Tejara

(adj) tetsüngtep masü, pilaa-pilaa aoba (having gaps)

*Nisung aika temesüla tejara asür.



Tir Yimym

OLONG PAITEP # 7065

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S___i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

OLONG PAITEP # 7064 TELANGZÜBA**TIPIEN :**

1. Tanga, 6. Wara, 7. Rajang,
9. Anük, 10. Jenjang,
11. Alar, 14. Ngashi, 15. Nala,
16. Mechi.

LANGTSÜNGLEN :

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

NAI-A YA METETTER MA

Brazil nung arishi küm 105 tain Manoel aser 101 tain Maria Dino na kibong kümer küm 84 buba liyonga arur. Tena ya Guinness World Record-i Manoel aser Maria na ya "longest living marriage" ta kuli agütsüogo. Manoel aser Maria na 1940 nung Boa Ventura, Ceará, Brazil nung kibong aküm aser tena tanur 13, semchir 55, tanabuba semchir 54 aser tasembuba semchir 12 lir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

Guwahati nung BPO centre ka lapok**Guwahati, February 15, 2025**

(Agencies): Assam Chief Minister Himanta Biswa Sarma-i February 15, 2025 nü Rural Shores BPO Delivery Centre ka lapoktsüogo.

Iba facility ya tamangba lennir Sadguru Sri Madhusudan Sai den yaritepa lapoker aser Assam nung lanurtem nem mapa inyaksü maongka agütsütsü.

"Onoki Guwahati nung dang masü saka Assam kübok tesem balala nung ibala mesükba infrastructure adokdaksütsü. Asen lanurtem tangalen mo state nung dang mapa inyaksü maongka agütsütsü" ta CM Sarma-i ashi.

Assam nung skilled workers aika tangalen mo mapa inyaksü atema aoer. Ajisiüka state nung BPO operations amenokba ajanga sorkari lanurtem tangalen meyoxtsü aser state rongsenketzüng jenjang ajungkettsü teimla lir.

Rural Shores-i rural BPO operations inyaker aser Guwahati facility nungi nisungtem yaritsü aser lisopur lanurtem nem mapa inyaksü maongka agütsütsü.

MOLUNGNEN O**9.7.1936-7.2.2025**

Onoki kodanga amatsü makokba temeim ojala, asür **Merangkala Imchen (Longjang)**, la manemi aliba mapang nungi la asüba mapang tashi nung onok den kija aser lokti tentet balala shirnokisa ozü asüko nung yaritepogo, nenok ajak dang pelaba metetdaksür. onoki meyiba agütsütsü kecha maka, saka tulusang Tsüngeremi nenok ajak maneni moajangma.

~ Temiem kinungbo, chirnurtem, anükapang, semchirtem aser kinungertem.

**OFFICE OF THE
LONGKHUM SOYAH KIDONG TELONGJEM KOHIMA
TENÜNGSANG AGÜTSÜR**

Longkhum Soyah Kidong Telongjem Kohima ajanga jenjang tajung nguteta konang nungsang tulu bener arutsüba atema tenüngsang tetushi agütsür.

1. **Smti. Yarenjungla Longkumer** (D/o Lt. Dr. Panjung) for being appointed as Additional Judge of Gauhati High Court.
 2. **Er. Moameren** (S/o Lt. Imkongtoshi) for being promoted to the post of Superintending Engineer under Power Department, Nagaland
- Tsüngeremi tarutsü wadang ajak nung takok aser anema aliba agüjang ta sarasademtsür

(Mr. Angangba Soyah)

(Mr. Shilutoshi Soyah)

PM Modi-Shah-i tamakok anguba ajanga President's rule benok: Gaurav Gogoi**Guwahati, February 15, 2025**

(Agencies): Manipur nung President's rule benokba ya Prime Minister Narendra Modi, Union Home Minister Amit Shah, aser Northeast nung BJP lenisübai tamakok anguba tamaittsü lir ta Assam MP Gaurav Gogoi-i ashi.

Chief Minister N Biren Singh-i mapa nungi sodi agiba

sülen anogo ishika lir Manipur nung Brihostibar nungi President's rule benokogo aser state assembly anendakja lir.

Manipur nung yimjung aser putepshitsü atema asalentong kecha mali ta Lok Sabha nung Congress deputy leader Gogoi-i ashi.

"Manipur state BJP kanga mejungi aliba ajanga President's

Rule benoktsü lenmang dang adok. Manipur aser India nung alirtemi iba dang tajungba nüngdaker" ta paisa ashi.

Manipur nung May 2023 nungi kin o kin tsüngda mepetmesü adoker rarayonga arudang nisung 250 tema taküm samaogo aser nisung meyrjang aika pei talidak toktsür jena ogo.

Manipur nung telungpur 7 apu; IEDs pezü ngutet**Imphal, February 15, 2025**

(Agencies): Chandel district nung Indo-Myanmar arrtsü anasa mapa lemozüka aliba central paramilitary forces-i telungpur 7 den prangpong-injang puogo.

Sajik Tampak nung Central Armed Police Forces (CAPF)-i Hokolbarnü telungpur 7 apu.

Nisung kar prangpong bener senzüba osang tejangja

angazükba sülen CAPF telok kati ajungbena mita ao. Idangji parnoki prangpong abenertem apu aser parnok ket nungi AK series rifles, single barrel guns, aser tanga prangpongtem ngutetogo.

Külen, Assam Rifles, Border Security Force, Central Reserve Police Force, aser Manipur Police külem telok kati Kakching district nung improvised explosive devices

(IEDs) pezü ngutetogo.

Osang tejangja kar nung ajemdaker parnoki Hiyanglam Natekhong Thongjin bridge anasa ayongküm nung mita aodang IEDs ngutet.

IEDs ajakji seret 5 shi liasü aser wires enoka liasü. Iba tesem nungsa single-barrel gun, modified sniper rifle, country-made pistol, hand grenades, aser injang aika ngutetogo.



Arunachal Pradesh kübok Mebo Sub-Divisional Administration aser yimtsüng tanishirtem tsüngda senden ka amenba sülen Mebo Sub-Division nung airguns amshiba, ayokba aser ayuba tenokdangba agütsüogo. East Siang District nung Head Gaon Burahs (HGBs), Gaon Burahs (GBs), aser village secretaries den senden amendang iba lemtet agia liasü. Tanü asüng airguns nung telescopes enoker amshiba ajanga ozü aser süsang aika khaseter aser iba tebilemtsü ajanga Mebo Sub-Division nung iba tenokdang agütsütsü lemtet.

Hamas-i ano Israel nunger asem chiokogo

Gaza City, Tsüklai/February 15 (Agencies): Palestine nunger telok Hamas-i, parnoki pua aliba Israel nunger asem Gaza Strip nung chiokogo. Ceasefire benokba sülen tang agi trokbenbuba tepuokertem melentepogo.

Israel nunger asem ya American-Israeli Sagui Dekel-Chen, Russian-Israeli Alexander Sasha Trufanov, aser Argentinian-Israeli Yair Horn ta jangjaago.

Parnok asem ya Honibarnü Gaza kübok Khan Younis yimti nung sentong tatsüka agiba mapang International Committee of the Red Cross nem bendanga agüja liasü.

Parnok asemprongla ya taoba küm October 7 nü Hamas puri southern Israel amakba mapang pur oa liasü.

Dekel-Chen, Trufanov aser Horn nungeri parnok chiokba kuli kakat aser Palestine map

bener aliba nguogo. Parnok ya par kinungertem melongjemdaksü tsüngda temang tendangtsü atema Is-rael-i anirogo.

January 19 nü nungi ceasefire tenzükbä sülen Honibarnü nisung asem chiokba densema Hamas aser Palestinian Islamic Jihad teloki Israel nunger ajak senteper 25 chiokogo.

Tepuokertem bendanga agütsüba tesem ya Hamas aser Islamic Jihad sepaitem aikati meketbanger aliba nguogo.

Sepaitemi meketbanger aliba tesem temeket nung tepuokertem chiokba reprangtsü atema tetsür, tanur aser tantsür tamburtem densema Palestine nunger noklang aika adenshir liasü.

Kasa mapang nung Hamas puri ashiba agi, "tsükchir tepuoker trokbenbuba chiokba ajanga sensaksem ajanga aser ceasefire nung nangzüktepba

ama anikdakba agi dang ashi parnok chioktsü atema tanga lenmang kecha mali ta jangjashitsür."

Tepuoker asem melena Is-rael-ia Palestine nunger tepuoker 369 chioktsü liasü, shirnok Israel kübok tepuokdak balala nung puoka lir. Ceasefire tenzükbä sülen tang Palestine nunger timba chiokogo.

Tepuokertem ya timba Gaza nung apuba lir aser parnok iba tesemisa meyipa yoktsü. Parnok 10 shi occupied West Bank-i yoktsü, occupied East Jerusalem-i ka yoktsü aser parnok 25 Gaza mesüra Egypt-i yoktsü.

Doha Institute for Graduate Studies nungi Muhanad Seloom-i ashiba agi, tang tashi nungbo telok anapronglai ceasefire benokba mapang nangzükteper aliba ama inyaksü meranga arudar.

DR Congo nung M23 telok Bukavu yimti-i iogo

Bukavu, Tsüklai/February 15 (Agencies): Democratic Republic of Congo anütoklen M23 telok iba tesem nung yimti tulutiba rongnung tanabuba Bukavu-i iogo.

M23 densema Congo River Alliance indang lenir Corneille Nangaa-i Reuters news agency dang ashiba agi, parnok South Kivu provincial yimtibai Hokolbar nikongtsütsü iogo aser Honibarnüa maneni tejakdangi aotsü merangtsü.

Linük balalai ceasefire benoktsü aser yimjung atema sensaksemtsü asoshi ayongzükba mapang ka nung tang Rawanda-i teyari agütsüba telok yagi iba jenjang agidar.

Iba teloki tesem balala aziüoka aoba mapang hopta ishika tsüngda nisung noklang aika pei talidak ki toktsür jeshia aotsüsa kümogo.

Toba ita Tutsi-i aniba M23 teloki linük anütoklen yimti tuluba Goma atsünga liasü. Congolese sorkari, parnok indang alirongsen ajanga ajangzüktsü atema iba tesem nung mepetmesü adokdaksüba atema Rwanda aitsüogo, koba Rawand-i magizüki arudar.

2012 küm mepetmesü adokba mapang M23 puri Goma yimti ya mapang tatsüka atema atsünga liasü, saka South Kivu province indang yimtiba Bukavu atsünga iba tesem nung mepetmesü ya jenjang tasen kati aitsü.

Iba yimti ya Rwanda den arrtsü nung Kivu awatsüng kümbang nung lir aser iba tesem ya local mineral shishilembartem atema tongitibang tesem ka lir.

Hokolbarnü Bukavu nungi km 30 shi pilar aliba airport-i M23 sepaitem ai aser Congolese army aser parnok den sendaktepa aliba telungpurtemi nokdangtsü memerangi atsüngina liasü.

Ajisüaka Bukavu tezülenbo kanga sashia

khtepogo, ta South Kivu indang Deputy governor Jean Elekano-i BBC dang ashi.

North len yimtsüng ka nungbo tekülemdak ka nung tasü mang 70 ngutetogo, ta local media sangdong balala ajanga metetdaksü.

MENUNGRA BILEMTETER



Asür IMTINUKSHI (Chuchuyimlang)
16.02.2024

Pungmang ka ama dang bilemer, saka asangsang nung nai onok toktsür orr tanü küm ka ajunger, ajisüaka asenok külemi aliba anogotem aser nü temeim onok molungjang nung na teti alir. Na mali onok kanga rongjener aser nü temeim mapatem menungra bilemteter.

Oba na onok mulungjang nung teti alitsü aser nü temeim teti bilkemtettsü.

~ Temeim Kinungertem aser Chimurtem.



OFFICE OF THE
MERANGKONG SENSO MUNGDANG
P.O TULI - 798618
DIST. MOKOKCHUNG : NAGALAND

TENÜNGSANG AGÜTSÜR

Merangkong Senso Mungdang Mendenti ajanga Wb. O. Imliwati, L.t. Olemtuba Jamir aser Wt. Narotosula na jabaso ajanga Nagaland Sorkar mapa Department of Directorate Treasuries & Account nung Director menden tongteta sensosanger nem konang nüngsang aser temoatsü tulu bener arutsü nung Senso Mungdang mendenti ajanga tenüngsang aser tetushi tulu agütsür.

Maneni sorkar aser nübor tenzüksü asoshi tulusang Tsüngremi pa aser par kibong arishi talang moajang ta sarasademtsür

Sd/-
Wb. Putiyanger Yaden
President MSM

Sd/-
Wb. Omatsüngba
General Secretary, MSM



Office of the
MOLUNGKIMONG SENSO MUNGDANG
P.O. Tuli, Police Station Tuli-798618
Dist. Mokokchung: Nagaland

ADVISOR TEMJENMENBA-I KHRISTAN YIMSU NAGA LIMA-I MEZÜNG ARUBA OTSÜ AIBELENA JEMBIBA MOLUNGKIMONG SENSO MUNGDANG-I JANGJATSÜR.

75 buba Jangpetkong Senso Mungdang (JSM) Molungyimsen yimdak amungdang 31st January 2025 anogo nung Advisor, Transport and Technical Education, Temjenmenba-i Naga lima-i Khristan yimsü mezü ng aruba otsü jembiba koba osang 1st February 2025 Local news paper aser digital media nung adokogo, ibaji tatalokba otsü shidakba den meputep asünung langzüksü tim ta ajiteta Molungkimong Senso Mungdang-i jangjatsür. News nungji Advisor Temjenmenba-i yamai jembiba ta zülua lir. "Naga putiotsü nung Molungyimsen ya kanga tongtipang lir kechiyong iba yimtsü ngi mezü ng Khristan yimsü aru aser iba sülen asen nübur ajak dangi ayimsü ng a prokshi. Anungji asen oboula nungeri yutsüba senmang ya asenoki maneni bentshia aotsüla," ta Advisor Temjenmenba-i tesentepertem ayongzük.

Iba sülen ano District Public Relations Officer (DPRO) Mokokchung, Department of Information and Public Relations, Govt. of Nagaland ajanga "Metongshitsür" (corrigendum) ta sür 5th February 2025 anogo yamai media nung adok, "75 buba Jangpetkong Senso Mungdang ta sür osang ka Nagaland Post aser danga Media platforms nung February 1, 2025 nü adokba nung tetushi süa jaokeri ashibaji, asen lima nung Khristan yimsü asoba yimtsü ng mezü ng pur rongnung ka ta zü ngdaksüner, ta DPRO Mokokchung sangdong ka ajanga ashi. Aibelenba asoshi sasar ta sangdong ajanga ashi. Advisor bai jembiba aser DPRO Mokokchung-i metongshitsüba, anaprongji shidak masü asünung otsü shidak metonga ayutsü meji ya jembitsüsa akumer.

Iba Mungdang nung nisung aika longsolongsoa dena liasü aser Mungdang nung adenertemi ashir, (primary evidence) 1st February 2025 anogo media nung prokshibaji Advisor bai jimbiba O tejangja. Anungji DPRO Mokokchung-i khuret benzüka, mejimbiba O kar agi melenshir metongshitsüba ji tesü ng mangtsüka aser tim masü.

Naga lima nung mezü ng Khristan yimsü agizükba yimtsü ngi ka dang aser iba yimji Molungkimong ta record tejangja lir aser ibaji nüburtemi meteta lir. December 22, 1872 anogo Dr. Edward Winter Clark- i Molungkimong yimdak Arogo ka tenzü k aser iba Arogo ji Naga lima nung mezü ng buba Arogo. Yamaji Naga tenem nung nübur ajakdangi Khristan yimsü tajung prokshitsü Dr. Clark- i mapa tenzü k. Iba mapang Molungyimsen yim maliasü. Khristan yimsü arur küm pezü lir ang Molungyimsen yim 24th October 1876 nung akum. Anungji 1872 küm atalokba otsü 1876 nungang yim akumer denji mezü teper nüburtem mangmangtsüsa mejimbitsüla aser Naga limai Khristan yimsü mezü ng aruba otsü küm pezü ji süktoker mejembitsüla.

Molungkimong yimtsü ngi mezü ng Khristan yimsü aruba kuli monument peria lir. Mezü ng buba Naga nungeri Dr. Clark asoshi amongsü ngkum lapoktsüba Dr. Clark Gate lir, Naga lima nung mezü ng buba Tsüsentsübu (first baptism pool in Nagaland) lir, Nagaland nung mezü ng Dr. Clark aliba kimong lir, Naga lima nung mezü ng Gudhula aliba kimong lir aser Naga lima nung mezü ng Tenlaki yangluba kimong lir. Item monument nung shingia nunga ta merakteper (undisputed). Aser item mapa ya Molungyimsen yim makumdang atalokba otsü lir.

Anungji, Advisor Transport and Technical Education ajanga jembiba "Naga putiotsü nung Molungyimsen ya kanga tongtipang lir kechiyong iba yimtsü ngi mezü ng Khristan yimsü aru" aser DPRO Mokokchung-i metongshitsüba "Khristan yimsü asoba yimtsü ng mezü ng pur rongnung ka", anaprongji otsü tai kechiasür Naga limai Khristan yimsü mezü ng aruba mapang Molungyimsen yim makum liasü.

Lokti lenir aser yimsüsür-i iba ama otsü tai lokti senden tulu nung jembibaji nüburtem meimra pei-sasa mapang shidak nung metongshitsütsüla/meyipa agitsüla. Yamaji mesüra tarutsü putu nüburtem tongtipangsa scholars, theologians, students aser amangbapurtem ajak asoshi ratamata (confusion) adokdaksütsü, kechiaser iba otsü ya aiben School examination, competitive exam aser academic discussion nung ajurur aser tiazü otsü prokbaji ajanga nüburtem aika meyanglushitetba takoksa tia-i yoker.

Molungkimong Senso Mungdang-i Information and Public Relation Department Government of Nagaland danga mepelar. Nüburtem asoshi shidakba otsü record asütsü melena tiazü otsü website- IPR. nagaland.gov. nungji record süa meyutsütsüla, kechiasür ibaji Govt. aser nüburtem taginüba anema lir. Anungji Advisor Transport and Technical Education aser DPRO Mokokchung nadang ya ashir, tekeraba nung tiazü otsü ji record nungjaki aitokang (delete), yudisüra shidakba otsü ji record süang, ajimesüra iba tiazü record jaki tarutsü nunga nüburtem tanü ama makmakdaksütsü.

Tarutsü putu nung nüburtemi shidakba otsü metettsü asoshi asen tetsü-teboui mezü ng Khristan yimsü agizüktsü asoshi koda taküm bendanga agüja mapa tulu inyak ibaji asenok ajaki akümtsübuttsüla aser iba otsü shidakba nungji asenok ajak külemi nokdakti ta Molungkimong Senso Mungdang-i sangdonger.

L.P. Toshi Lkr.
President

Imo Lcr.
Secretary

Molungkimong Senso Mungdang Molungkimong Senso Mungdang

Sinner nem ita 3 tenokdangba agütsü

Tsüklai/February 15, 2025 (Agencies): World number one Jannik Sinner-i, World Anti-Doping Agency (Wada) den tangatettep ka dangi aruba sülen ita asem atema tenokdangba agütsüba agizükogo. Taoba küm anaben tashi pa dak tenokdangba agütsür aliba mozü tendangteta liasü.

Arishi küm 23 tain Italy nunger asayar shibai taoba ita Australian Open koka liasü, pa nem February 9 nungi May 4 nü tashi tenokdangba agütsüogo.

Pa taruba Grand Slam French Open nung asayatsü asoshi temsüa alitsü, koba May 19 nü tenzütsü.

Honibarnü sangdong ka ajanga Wada, shirnoki Sinner nem taitok agütsütsü atema telemtetba agiba anema Court of Arbitration for Sport (Cas) nem takhangba ka agüja liasü, parnoki ashiba

agi, pa pa indang physio-therapist-i asa mesüi tenokdangba agütsür aliba clostebol mozü amshia menentsü ta ashiba agizükogo.

Sinner-i ashiochtsütsü tebilemba nung jenjang agiba masü, aser iba mozü yagi pa asaya nung kecha tajangzük magütsü aser pai iba mozü amshiba memetet, koba par staff aibelen liasü ta ashiba Wada-i agizükogo.

Kasa mapang nung Sinner-i, "iba ken o yagi joko küm ka shi minpronga arudar inyakyim ano talangka aotsü lir aser telemtetba ya küm tatemiang agitsü akok.

"Ozü team-i kechi inyaker aji kü khuret lir aser Wada indang temzüng ozüng tesashi ya ni meimba asaya kümzüka ayutsü atema tongtambang ta angateter. Iba dak ajemdaker ni Wada-i ita asem tenokdangba agüja iba

inyakyim bentettsü asoshi benokba niagizükogo," taashi.

2024 küm March ita tenokdangba agütsür aliba steroid clostebol putetba sülen independent panel kati Sinner-i kecha aibelen masü taashi.

Pa ya pa indang physio-therapist-i menentsü ta agizükogo, shibai pa teka ranger aliba over-the-counter spray kati anepalutsü, koba tesülen tenokdangba agütsür aliba mozü ta nguteta liasü.

Tenokdangba agütsüba agizükba sülen Sinner Italian Open nungi asaya tenzüktettsü, koba May 7 nü tenzütsü.

Pa Indian Wells aser Miami aser French Open masaya tsüngda clay court asayamung kar nung masayatettsü.

Wada-i ashiba agi, Sinner April 13 nü nungi official training tenzüktettsü.

FA-i Everton, Liverpool aser Slot aitsü

Tsüklai/February 15, 2025 (Agencies): Bodhbarnü Goodison Park nung Merseyside derby tatemi mepetmesü adokba sülen Football Association-i Everton, Liverpool aser Arne Slot aitsüogo.

Final whistle sülen asayartem mazüoktetba atema club ana ya aitsüogo.

Liverpool head coach Slot-a, yimayimpong shitak mebenshiba aser referee Michael Oliver aser pa indang assistants ka anema o tamajung jembiba atema aitsüogo. Iba atema pa nem red card agütsür liasü.

Slot indang assistant Sipke Hulshoff, shiba red card agütsür tugudakja liasü, pa-a pa metugudaktsü aser tugudaktsüba sülen yimayimpong tamajung benshiba atema kasa aitsüogo

Club ana, Slot aser Hulshoff nungeri February 19 nü tashi nungbo parnok aitsüba dak sendakba nung telangzüba agütsüsüla.

Curtis Jones aser Abdoulaye Doucoure na asaya tembangba sülen mangatettep adok aser iba ajanga team ana nungi

tsüngda mepetmesü tenzüka liasü. James Tarkowski-i minute 98buba nung Everton atema goal ka idakja goal 2-2 ta kasasa akümba sülen mepetmesü ya tenzüka liasü. Video assistant referee (VAR) asadangba sülen iba goal ya agüja liasü.

Liverpool puri ashiba agi, goal idaktsütsü atema asayatepba mapang Toffees striker Beto-i Reds defender Ibrahima Konate nongtok asünung goal ya magi kümduksütsüla.

Everton midfielder Abdoulaye Doucoure-i asaya tembangba sülen Liverpool fans anasa benjung tenzüka aser iba sülen Reds midfielder Curtis Jones den mangatettep adoka liasü. Asayar anaprongla nem redcard agüja liasü.

Slot aser Hulshoff na nema red card agüja liasü.

Iba asaya kasasa nung tembangba sülen Liverpool pur Premier League nung tanabuba jenjang nung aliba club dang nungi point tenet agi timba kümogo aser Everton pur jenang 15bubai tuogo.

ODI rankings: New Zealand 4bubai tuogo

Tsüklai/February 15, 2025 (Agencies): Pakistan nung tri-series asayamung nung khen danga tamakok mongui asayaba sülen New Zealand team International Cricket Council indang ODI rankings nung pezüububai tuogo.

England den ODI asayamung nung asaya asemprongla akokba sülen ODI rankings nung India team maneni temaba jenjang nung lir.

South Africa aser Pakistan na den asayamung nung asaya asem khen danga

tamakok mongui asayaba sülen New Zealand team indang rating points 100 aliba 105 jungogo aser asaya 42 nungi point 4,414 ngua parnok tang 4buba nung lir.

Pakistan den final asaya nung asaya akoktsü atema run 243 arishiba mapang New Zealand team-i over 45.2 nung dang iba run ya menepa asaya ayong ayonga akok.

Iba asaya nung tamakok anguba sülen Pakistan team rating point 107 dang kuma asemububai luogo. Iba

asayamung nung final densema parnoki asaya asem nung ana mekoki liasü.

ICC ODI rankings nung India team-i point 119 ngua parnok maneni temaba jenjang nung lir. Tawa England den kidang ODI asayamung ya India team-i 3-0 agi ayong ayonga koka temaba jenjang nung parnok jenjang yanglushiogo.

Sri Lanka den asayamung 2-0 agi mekokaka Australia team maneni tanabuba jenjang nung lir. Parnoki point 110 ngua lir.



Zenith Club Lirmen-i ayongzüka 1buba open cricket running trophy February 12 nungi 14 tashi Lirmen yimdak asayaogo. Asayamung lapokba sentong nung tongti tejaokerji Imliwapang longkumer, Proprietor, MoK Express, MKG & Managing Director, Oracle School Diphupar Dimapur liasü aser asayamung shibangba sentong nung tir, BJPYM, 30th Alongtaki Constituency Sentimeren Lkr alakteta jaoker liasü. Iba asayamung nung Nagaland nungi team 6 aser Assam nungi team 3 ta team 9-i shilem agia liasü. Final asaya Zenith A team aser Mohima SP Amguri na asayaba Zenith A team-i koka liasü.

Ben Champions Trophy asayatettsü

Tsüklai/February 15, 2025 (Agencies): England team nung opener Ben Duckett asayatsü atema temsüa lir ta Honibarnü sangdongba sülen ICC Champions Trophy atema team jenjang tajungba kümduksüogo.

England and Wales Cricket Board (ECB)-i, left-handed batter groin yiruba indang osang ya jangjashia liasü.

"Groin tabelen yiruba scan asüba sülen England tebur team nung batter Ben Duckett anema lir aser pa ICC Champions Trophy nung asayatettsü ta jangjaogo," ta ECB-i sangdong ka ajanga metetdaksü.

Bodhbarnü Ahmedabad nung India den tasembuba ODI asayaba mapang mezüngbuba innings nung fielding amendang Duckett yirua liasü.

Iba ODI asayamung nung

England-i asaya asem nung ka danga mekoki liasü. England team-isa T20 asayamung nung India team 4-1 agi makok.

"England team iba asayamung nung Honibarnü, February 22 nü Lahore nung Australia den mezüngbuba asaya masaya tsüngda Pakistan-i February 18 nü aotsü," ta kasa sangdong ajanga metetdaksü.

Taküm ICC Champions Trophy ya Pakistan aser Dubai na nung asayatsü renema lir. India team asaya ajak Dubai nung oa asayatsü.

ICC Champions Trophy 2025 atema England Squad - : Jos Buttler (c), Jofra Archer, Gus Atkinson, Jacob Bethell, Harry Brook, Brydon Carse, Ben Duckett, Jamie Overton, Jamie Smith, Liam Livingstone, Adil Rashid, Joe Root, Saqib Mahmood, Phil Salt aser Mark Wood.

BILEMDANGANG

"Nai mapa tulu meinyaktetra, mapa tila ka tabensaba nung inyakang."